

# Kontuola

ANTZUOLA / Egubakoitza / 2001eko abenduaren 21a / 94. zenbakia

KOORDINATZAILEA: Aintzane Irizar • Barrenkalea, 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com

## Aurtengo aurrekontuei 78 milioi gehitzea erabaki zuten abenduko osoko bilkuran

AINZANE IRIZAR


Kreditu aldaketarako espedientea hastea onartu zuen Udalak, joan zen abenduaren 5ean egindako osoko bilkuran. Horrek esan nahi du, aurtengo urterako aurrez ikusitako aurrekontuari 78 milioi pezeta gehituko diola Antzuolako Udalak.

EAJ-EAko ordezkariak aurkako botoa eman zioten kreditu aldaketarako espedientea hasteko proposamenari, eta EHko bat abstenitu egin zen. Azkenean, alkatearen kalitateko botoarekin, aurrera atera zen erabakia.

Aurrekontuak onartu zituztenetik, aurrez ikusi ez zituzten hainbat gastu sortu zaizkio Udalarari. Izan ere, abian jarrita zeuden hainbat proiektu eta lanek ezusteko bat baino gehiago sortu dute. Horregatik erabaki dute kreditu aldaketa hori egitea, Unamuno alkatearen esanetan.

### OLARAN ETXEA

Alde batetik, Olanan etxearen proiektua dugu. Proiektu horrek "hainbat akats eta hutsune zeuzkan", azaldu digu alkateak. Bes-



Sagastiko urbanizazio lanetan, mendiari eusteko lan handiak egin behar izan dituzte.

teak beste, uraren kanaloirik ez zuen proiektuak, eta hainbat neurketa gaizki eginda zeuden.

Olanan osteko inguruaren urbanizazio proiektuan ere izan

da aldaketarik. Lanekin hasteaz bat, lurra mugitu egiten zela ohar-tu ziren; izan ere, lur hori duela ehunka urte mendian behera etorritakoa zen. Urbanizazio lane-

tarako ateratako lurra ezin izan zuten betelanearako erabili; garraiatu beharra izan zuten, eta betelanearako, kanpotik ekarri behar izan zuten lurra. Gainera,

### Olanan etxean eta Sagastiko urbanizazio lanetan hainbat gastu sortu zaizkio Udalarari

mendiari eusteko lan handiak egin behar izan dituzte, horrek guztiak dakartzan kostuekin.

EAJko Jose Angel Zabaloren esanetan, "obra horien inguruko informazioa aztertu ondoren, ikusten dugu prozedimendua ez dela normala izan". Hori guztia zeharo argitu arte ez zutela aldeko botorik emango adierazi zuten EAJko ordezkariak osoko bilkuran. Era berean, kalean gai honi buruz dabiltzan zurrumurru asko faltsuak direla ere adierazi digu Zabalok.

### MIKEL LARRAÑAGA ZINEGOTZI BERRIA

Jose Luis Kortabarriak dimisioa aurkeztu zuen abenduaren 5ean. Kultura batzordeko zinegotzia izan da Kortabarria. Orain, Mikel Larrañagak hartuko du Kortabarriak lagatako lekua.

## HERRITARREN HITZA / Iñigo Ramírez de Okariz • Irakaslea

### Kudeaketa

Trafikoa gai bezala hartuta hemen idatzitako azken artikulua zer pentsatu eman zidan; edo, hobeto esanda, eman zigun. Herritar bat kezkatuta azaltzen zen udaletxekoa den langile batek bere lana ongi betetzen ez zuelako. Ezin esan idatzitakoa ezer barik pasatu zenik herrian, lagun arteko tertulian ere herritarrek emandako iritziei buruz aldeko eta kontrakoak azaldu zirelako. Morroia edo ugazaba, langilea edo nagusia ote zen erruduna zen gure eztabaidetan adostasun ezaren puntua. Hau da, batzuek, Udala enpresa pribatu

bezala hartuta, alkatea jartzen zuten egoera horren erruduna; beste batzuek, Udala, enpresa publiko (eta gure kasuan txikia) izanik, langileriaren profesionalitate mailan jartzen zuten akatsa.

Udaleko kudeaketa, orain eta beti izan da eztabaidatzeko gaia: teknikariak euren lana ongi betetzen ez dutelako, funtzionario hauek ahalik eta lan gutxien eginez bizi direlako... Beraz, diagnosti-



"Jendeak nahiago izaten du kalean jardutea"

ko honetara iritsi baldin bagara, zein den egoera horren arrazoia ikertzea falta da.

Lau urtetik behin, herritarrek aukera izaten dute ordezkariak aukeratu eta udaletxean lanean sartzeko. Egia esanda ez da erraza izaten jendea aurkitu eta ustez zinegotziak izango

diren zerrendak betetzea. Izan ere, gauza bat da kalean jardutea, eta beste bat, behar den tokian esan eta konponbide

bat aurkitzen lan egitea. Lan gogorra da, eta esperientziak dakigu jendeak nahiago duela lehena bigarrena baino, kalean jardutea, alegia, eta ez konponbideak topatzen lan egitea.

Egia da langile talde batek ez baldin badauka nor agindu, nor bideratu, erreferenteak galduz desmotibatu egiten dela, eta berrantolatu egin behar dela.

Arazaok arazo, dedikazio osoa duen alkateari dagokio herritar batek adierazitako kexa hori une honetan egiazkoa den ala ez ikertzea, eta ahalik eta azkarren (eta ongien) horri konponbide bat aurkitzea.

## LABUR

### Arbulu-Mendizabal bikoteak irabazi du pilota txapelketa

Zapatu arratsaldean jokatu zituzten herri mailako eskuz binakako pilota txapelketako finalak. Arbulu eta Mendizabalek osatutako bikotea izan zen lehen mailako txapeliduna, Aranburu eta Lizarralde-ri 22 eta 18 irabazi ondoren.

Bigarren mailan, berriz, nabarmenagoa izan zen bi bikoteen arteko alde. Larrea eta Aranguren izan ziren bigarren mailako irabazleak; 22 eta 10eko emaitzarekin nagusitu zitzaizkien Sansebastian eta Iparragirrerri.

**BASERRIZBASERRI/ Lausagarreta**



**DANTZALDIK ETXAURREAN** Kaletik ia bi kilometrora dago. 1391koa da baserri honi buruz dagoen lehen aipamena, eta Geronimo Ibanes Lausagarretaren izenean zegoen garai hartan. Gaur egun etxebizitza bat besterik ez du, baina XIX. mendean bi ei zituen. Badago baserri honi buruzko datu bitxi bat: 1927an, Miguel Mendiarez Lausagarretako biztanleak, baserrian ardoa saldu, janariak eman eta kafea eskaintzeko baimena eskatu zuen. Ez zuen lortu, Uzarragan bazegoelako taberna, baina azkenean, etxe aurrean batzarrak eta dantzaldiak egiteko baimena eman zioten. Gaur egun Jose Luis Telleria bizi da hantxe. /AINTZANE IRIZAR /ITURRIA: IÑIGO RAMIREZ DE OKARIZEN 'ANTZUOLAKO BASERRIAK ETA ERROTAK'

**ANTZUOLAKO HIZKERAN**

**ESAMOLDEA**

- **ALPERRIK GALDU**
  1. Hondatu. *Esnia alperri(k) galduta dago.*
  2. *Ez alperrik galtzia: ondo moldatzea. Diru gutxi ibili arren, haura etzan alperri galduko, ez.*

**ATSOTITZA**

• **Itturri bidian dabilen pitxarra apurtzen da.** Dabilenari gertatzen zaio-la esan nahi du.

**HITZAK**

- **ERRENDIDU**
  1. Etsi.
  2. Batek bestea menderatu. *Burrukan hasi zien, eta batak bestia laister errendiu zeban.*
  3. *Loguriak errendiu. Luak erreta zeguan, baiña errendiu da, horregaittio!*
  4. *Gastatu. Kostako jako daukan diru danak errenditza!*

• **GOGAIKARRI**

Gogaitzen duena, aspergarria. *Gogaikarri bat izen bihar jonan, iñork etxonan nahi izeten berakin alkarterik.*

*Jone Larrañagaren 'Antzuolako hizkera' liburitik*

**TELEFONO JAKINGARRIAK**

**OSASUNA/LARRIALDIK**

- DYA ..... 943 78 71 57
- Gurutze Gorria ..... 943 76 55 76
- Medikua ..... 943 76 62 23
- Praktikantea ..... 943 76 63 80
- Udaltzaingoa ..... 943 76 62 46
- Ertzaintza ..... 943 76 53 40

**UDALA**

- Udaletxea ..... 943 76 62 46
- Liburutegia ..... 943 76 60 65

**BESTELAKOAK**

- Idolaz ..... 943 78 60 12
- Herri ikastetxea ..... 943 76 62 68
- Jubilatuena elkartea ..... 943 76 62 71
- Abadetxea ..... 943 76 64 16
- Anelkar (Kontxi) ..... 943 78 70 65
- Taxiak:
  - Antonio Fernández ..... 669 15 65 40
  - Jesus M. Fernández ..... 607 31 85 60

**MEZAK**

**ANTZUOLAKO PARROKIA**

Lanegun eta zapatuetan: 19:30  
Domeka eta jaiegunetan: 09:00, 11:30

**UZARRAGAKO PARROKIA**

Domeka eta jaiegunetan: 10:00

**LABURRAK**

**PAUSOKAREN BATZARRA**

Joan zen asteko martitzenean izan zuen urteko batzarra Pausokak. Besteak beste, datorren ikasturterako asmoei buruz aritu ziren. Umeendako jangela jartzea da Pausokaren erronka nagusia hurrengo ikastaldirako. Jangelan izena emateko interesa dutenen zerrenda osatu nahi dute urtarrilerako. Nahi duzenok, beraz, Pausokako arduradunetako bat den Amaia Etxanizengana jo dezakezue.

**BARKERORI OMENALDIA**

Bi urte bete dira Xabier Barkero antzuolar gaztea hil zela. Ordutik urtero egin ohi duten moduan, aurten ere omenaldia egingo diote Antzuola Kirol Elkartekoek. Abenduaren 29an izango da hori, arratsaldeko 16:00etan. Antzuolako erregional taldeak Eibar B taldearen aurka jokatu du.

**BOTEPRONTOAN/ Amaia Zabaleta · Kirol teknikaria**

*“Herriko kirol egoeriaren diagnosia eginda dago, eta orain, kirol politikia zehaztia da nere lana”*

**A**zaroan hasi zen Amaia kirol teknikari lanean. Udalarendako kirol politika zehaztea izango da bere eginbeharra. Printzipioz, lau hilabetean arituko da horretarako lanean.


**Zein izango da zure lana?**  
Herriko kirol taldiek beti esan izan dabe Udalian kirol teknikari bat bihar dala. Azkenian, lau hilabeterako besterik ez bada be oraingoz, hasi naiz lanian. Orain dala bi urte herrixan kirola ze egoeratan zeguan ikusteko, diagnosi bat egin zan, eta neuk egin neban. Orain, nere lana Udalaren kirol politikia markatzea, zehaztia izango da. Dana dala, lau hilabete honetan ez da nere

lanaren emaitzarik ikusiko, kalian ez da nabaritu hori, baiña gerorako ze politika eraman bihar dan, behintzat, markatuta geratuko da, politikuek nere proposamena onartzen badabe, behintzat. Eta nere lanarekin lotuta, esan bihar da, kirol politikia zehaztiaz gain, herriko kirol talde edo bestelakuek atiak zabalik dauzkela, edozer laguntza bihar izanda be. Hori be nere lana da eta.

**Eta zein da Udalaren eginbeharra kirolari dagokionez?**  
Hiru alorretan banatzen da Udalaren zeregiña: guztiontzat kirol eskaintzak antolatzea, eskola kirola bultzatzea eta instalaziñuen arduria be badauka.



**Ze egoeratan dago Antzuola kirolari dagokionez?**  
Alde batetik, kirol klubak behera doaz, gero eta indar gutxiago dauke herri maillan; baiña hori ez da Antzuolako kontua bakarrik, herri danetan dabil hori pasatzen. Beste alde batetik, instalaziñuen biharra be badagola pentsatzen jat. Batez be estalittako instalaziñuena, frontoia bakarrik daukagu-ta.  
**Kirol eskaintza zabalaz antolatzen du Udalak herri-tarrendako, ezta?**  
Bai, aerobik eta gimnasiako eskolek sekulako arrakastia eduki dabe herrixan hasieratik; jendia pozik dago; zerrendatan zain dagoen jendia eta dana daukagu.



**Zabalo Iturgintza S.L.**

Bidea eginez

Tailerra: Uzarraga bidea, 10. Antzuola. Tf. 943 78 71 78  
Erakusketa: Kalebarren, 1. Antzuola. Tf. 943 78 71 79, Tf. eta F. 943 76 64 73

- Gasa
- Berogailuak
- Haire egokitua
- Enpresen mantenimendua
- Lurrin instalazioak
- Bero-aurrezteak
- Bainugelak. Proiektuak momentuan DIBaren bidez
- Birgaitze-espeditentak bideratzen ditugu

**MUJIKA HARATEGIA**



**Berezitasunak: Etxean hazitako zekorrek eta oilaskoak**

Kalebarren, 1.  
**ANTZUOLA**  
Tf. 943 76 64 34

**LEKV-BERRI MERENDEROA**

Janariak eta edariak

Tf. 943 76 60 94  
ANTZUOLA